



La visualisaziun dal project «un solo arco» stat gia. Però ina realisaziun da la punt pudess cuzzar anc 5-7 onns.

VISUALISAZIUN CONZETT CRONZINI PARTENARIS SA

Cun «un solo arco» vers Arosa

Ussa è sin maisa il project da la punt nova da Son Gliezi a Cuir. La regenza grischuna ha acceptà la proposta da la giuria ch'ha tschernì il victur tranter 41 projects inoltrads en ina concorrenza. Il project «un solo arco» dal biro d'inschigneria Conzett Bronzini e partenaris è vegnì preschentà venderdi a Cuir.

Il project dals planisaders Conzett Bronzini e partenaris prevesa ina punt ad artg d'atschal da 420 meters. Igl è ina punt filigrana e fina che duai colliar directamain la via dal Güglia (vers Malix e Lai) cun la via dal Scanvetg (vers Arosa). Ella pudess uschia er distgargiar il traffic tras il quartier «Sand» a Cuir.

Plaschair e respect

Cun Conzett Bronzini da Cuir gudogna in biro d'inschigner indigen ed era enconuscent en il Grischun. Il cumpossessur dal biro, *Jürg Conzett*, ha bain plaschair da survegnir l'incumbensa dad elavurar vinavant ses project. Tuttina mussa el envers RTR era respect per quest'incumbensa: «Igl è sa chapescha grondius per nus da gudagnar cun uschè in grond project gist davant nossa porta-chasa. Però nus na pudain betg ans servir qua dad experientschas gia fatgas – questa punt è uschè gronda ed auta! I vegn ad esser ina sfida. Nus la stuain pensar da frestg, tenor las premissas dadas al lieu.»

La punt la pli fina e curta

Il project da Conzett Bronzini adempleschia il meglier ils criteris concepziunals, uschia il giudicat da giuria e da la regenza ch'è vegnì preschentà venderdi a Cuir. Il project correspundia sin plirs nivels a l'idea da la persistenza. Pli navant saja la punt tranter tut las projectaziuns

«Igl è sa chapescha grondius per nus da gudagnar cun uschè in grond project gist davant nossa porta-chasa.»

Jürg Conzett,
planisader e victur da la concorrenza

inoltradas la pli curta ed ella giaja a prà esteticamain a moda armonica cun il maletg dal lieu e da la cuntrada. Era cusseglier guvernativ *Mario Cavigelli* è stà commember da la giuria. El commentescha la tscherna da la punt da Conzett Bronzini cun ils peds: «Igl è ina punt fitg interessanta, perfin innovativa. Ord vista estetica èsi ina punt ad artga fitg platta che s'integrescha bain en la cuntrada ed il maletg da la citad.» El spera perquai che la punt tschernida chattia «ina buna acceptanza tar la populaziun da Cuir e dal Grischun.»

Tranter ils 41 projects eran tals da planisaders enconuscents. Sin il segund plaz da la concorrenza è per exempel vegnida rangada la

punt proponida dal biro dal enconuscent architect *Santiago Calatrava* ch'ha gia realisà plirs projects pli gronds era en Svizra.

Diversas intschertezas

Cura che la punt po dentant propi vegnir construida stat anc en las stailas. Sche tut giaja bain, saja quai en 5-7 onns, ha il cusseglier guvernativ Mario Cavigelli ditg envers RTR. Ina gronda dumonda è quantas protestas ch'i vegn a dar encunter quest project. Plinavant n'è er la finanziaziun anc betg clera. Per exempel quant che la Confederaziun surpigliass. Mario Cavigelli calculescha cun custs da 50 fin 100 milliuns francs per la punt.

Project cun lunga istorgia

La punt da sviament da Son Gliezi è ina pagliola pli difficila. Gia l'entschatta dals onn 1970 avevi dà in project «Hochbrücke Plessur» per colliar la via dal Güglia cun la via d'Arosa. Quest project n'è però mai propi vegnì publictà. L'ultim project per la punt era vegnì preschentà il 2008. Però diversas personas perturgadas dad ina construcziun da quella punt han fatg recurs. A quel recurs ha il Tribunal federal dà raschun parzialmain. Sinaquai ha la regenza grischuna retratg dal 2017 il project ed incumbensà l'Uffizi da construcziun bassa dad elavurar in nov project. (rtr/fmr)